



En memoria da

Pader Silvio Deragisch (1940 - 2017)

Ils 16 d'avrel 2017 ei pader Silvio Deragisch morts suenter ina greva malsogna ella staziun da tgira dalla claustra dils caputschins a Sviz. „Bandunar quest mund la damaun da Pastgas, la fiasta dalla levada da Jesus Cristus, ei per in spiritual, per in carstgaun ch'era pinaus e leva murir, ina grazia“, scriva Adalgott Berther en ina communicaziun a sias cameratas ed a ses camerats dall'annada 1940.

Frà Silvio Deragisch, sco quei ch'el vegneva nunmnaus il pli bugen, era enconuschents sco spiritual dils impedi, sco plevon dallas 3 pleivs dalla Tumliasca (Tumegl, Pasqual e Rodels), sco spiritual modern, liberal, magari nunconvenziunal, ecumen, sco referent e sco celebrant encuretg tier battens e nozzas. El ei era s'engaschaus ella pressa, tier il radio e la televisiun, il bia en favur da carstgauns impedi.

Origin e scolaziun

Silvio Deragisch ei naschius ils 18 da december 1940 sco secund affon dalla gronda famiglia da Valentin e Maria Deragisch-Derungs. Il bab era scrinari e la mumma haveva ina gronda truscha cun 11 affons. Per ella haveva Silvio ina speciala affecziun. Insumma eis el staus in grond sustegn per sia famiglia che ha fatg atras pliras nauschas fridas. Igl atun 1955 serenda Silvio el collegi Maria-Hilf a Sviz per far il gimnasi. Leu ha el anflau era divers cumpogns romontschs che serimnavan da temps en temps en l'Academia romontscha cun il preses sur Benedetg Giger, il vicerectur dil collegi. Divers students havevan lu era da far in referat sur dad in tema ni l'auter. Il Silvio era s'occupaus gia d'in temps dalla geneaolgia da sia famiglia, specialmein da siu basat original, Placi Jacomet. Perquei haveva el delectau ses constudents en in bien romontsch cun interessantas expectoraziuns. Sper la scola havevan ils students era la pussevladad da s'occupar dalla musica. Cun aunc enzacons auters scolars romontschs ha Silvio empriu da sunar la

ghitara tier igl enconuscent professor Paul Kamer. Quei ei stau ina buna decisiun, perquei cun quei instrument ensemen cun canzuns ha el pli tard delectau specialmein ils impedi, denton era autras societads.

Igl onn 1962 fa Silvio la matura. Ch'el studegi teologia era enconuscent a ses camerats. Ch'el mondi denton tiels caputschins ei stau ina gronda surpresa! Igl atun suenter las vacanzas da stad serenda el a Lucerna per far il noviziat. El survegn il num Vigeli ch'el sa lu midar suenter in per onns e returnar tier siu num original Silvio. Suenter il noviziat suonda il studi da filosofia e teologia a Soloturn, nua ch'ils caputschins havevan da lezzas uras in seminari teologic. Leu finescha el 1967 ses studis. Ils dus da fenadur da quei onn vegn el ordinatus spiritual digl uestig Franziskus von Streng ed in'jamna pli tard celebrescha el la messa nuviala ella baselgia parochiala da Sedrun. Bab spiritual era il plevon da leu, sur Giusep Durschei, predicator sur Christian Monn, igl anterius prefect e professor da franzos dil primiziant. Igl ei stau in di nunemblideivel, buca mo dil punct religius anora, mobein era pervia dalla participaziun dallas uniuns da cant e musica e digl entir pievel tuatschin da bellezia aura da stad.

Suenter il studi da teologia cuntascha Silvio cun la scolaziun: tier igl Institut da catechesa a Lucerna obtregn el ina buna formaziun sco scolast da doctrina ch'el finescha cun l' extendida lavour da diplom: Elemente zur religiösen Gemeindebildung mit Hilfe der Oberstufencatechese.

Lavour ella practica e secund studi

Suenter la scolaziun extendida lavoura Silvio sco catechet sin divers scalems dalla scola populara a Turitg. El lavoura era en gruppas da giuentetgna, meina differents camps da vacanzas la stad e fa era visetas tiels geniturs da ses scolars. Ina ulteriura occupaziun ei la formaziun ulteriura da catechets. El haveva denton daditg il giavisch da semetter en per ils impedi ch'ein agl ur dalla societat e baselgia. Per esser denton propri à jour cun l'occupaziun da quels carstgauns sedecida el da far naven da 1977 entochen 1979 la scolaziun corrispondenta tier la Scola da pedagogia curativa a Turitg. Quella finescha el cun la lavour da diplom „Christliche Grundsätze für Heilpädagogik“ tiel professor Jürg Grond oriunds da Müstair. Diesch onns eis el lu s'engachaus ella pastoraziun da carstgauns cun impediments da spért e suords el cantun Turitg. Lu retuorna pader Silvio el Grischun, supren la pastoraziun ecuménica dils cussadents dalla Fundaziun a Scharons (25 onns) e segida ella pleiv

da Tusaun. Plaun e plaun s'engascha el el era pils cussadents impedi dalla Casa Giuvaulta Rothenbrunnen ed en differentas casas d'impedi a Cuera e contuorn. Damai ch'ei deva el Grischun neginas gruppazius che cumpeglian la nuviala cristiana per carstgauns cun impediments, sedecida pader Silvio 1992 da fundar el Grischun zatgei semegliont en collaboraziun cun Claire e Peter Reinhard, caucasa ell'Argo a Cuera e cun il plevon reformau Reinhard Kipfmüller permiert. L'organisaziun che vegn fundada secloma Khurereketti. Ella organisescha per regla l'emprema dumengia dil meins a Cuera ni a Tumegl sentupadas cun temas religius, denton era da natira divertenta e dasperas aunc ulteriuras occasiuns sco tscheiver e spassegiadas. La Khurereketti ha cuzzau tochen igl onn vargau, ha denton suenter 25 onns stuiu calar muort munconza da collaboraturs pli giuvens.

La laver principala ella Tumliasca mutta denton la pastoraziun dalla pleivs Tumegl, Rodels e Pasqual. Igl onn 1991 sa el affittar la casa pervenda a Tumegl, ella quala era sia casarina, Letizia Deplazes-Hendry vegn cun sia famiglia naven da Sedrun. Cheu han els duront 25 onns in bien dacasa, nua ch'ei regia era ina gronda hospitalitad. Aschia haveva pader Silvio per exemplu envidau ils 15 da zercladur 2015 sias cameratas e ses camerats da Tujetsch dall'annada 1940 ad ina sentupada. La relaziun cun sias pleivs era fetg amicabla. Ils 27 da matg 2012, a caschun da plirs giubileums da pader Silvio, conta il „Kirchenchor Concordia Ausserdomleschg“ la messa romontscha da pader Beat Ludescher (clastra da Mustér, 1877-1847) en quater vuschs accumpignaus d'ina gruppa d'instrumentalists. Da quella messa exista in disc cumpact. Ella era medemamain vegnida cantada a caschun dalla messa nuviala da Silvio ils 9 da fenadur 1967 e vegneva cantada mintgamai las sondas endamaun dalla stad a Zarcuns.

En casa pervenda dat ei era plaz per la gronda documentaziun da catechesa che pader Silvio ha creau sco scolast da doctrina e sco docent el Center catechetic grischun a Cuera. El haveva era grond interess per la litteratura romontscha ed acquistava mintgamai las novas ovras che completavan sia preziosa collecziun da cudischs romontschs.

Partenza da Tumegl – e cumiau

La dumengia dalla rogaziun, ils 18 da settember 2016 festivescha Pader Silvio siu davos survetsch divin ella baselgia parochiala da Tumegl. Ei regia ina atmosfera pietusa ed impressiunonta, cura ch'el banduna alla fin dalla

messu sut grond applaus sco emprem la baselgia emplenida da biara glieud ch'era vegnida per engraziar a siu plevon. Silsuenter suondan divers concerts ed in apperitiv. Suenter quella festivitat ha ei giu num reglar la surdada dalla pleiv e bardigliar. Il meins november sa el entrar ella claustra da Rapperswil. Ins era spanegiaus, co el sappi seviver en puspei en ina claustra, suenter ch'el haveva viviu il grond temps ordeifer ina cuminanza monastica. Ils 19 da december 2016 communichescha el denter auter: „Haiel cheu en claustra ina fetg buna communitad e surtut modernas liturgias. Sundel cheu da casa“. Denton gia l'entschatta 2017 dat el part ch'el seigi grev malsauns, hagi buca da viver ditg pli e mondi proximamein ella claustra da Sviz nua ch'ils caputschins malsauns vegnan tgirai. Denton nuot da lamentem, reproschas, rebelliun e tristezia! El haveva acceptau siu destin. Quella tenuta ei era stadas da constatar a caschun dallas visetas e dils telefons. El haveva il basegns da schar reviver sia veta, haveva fatg sia annunzia da mort e reglau differentas caussas. El veva buca tema dalla mort. Pliras gadas ha el detg: „Ju sun ventireivels“. Aschia sa mo in carstgaun cun gronda cardientscha resdar. Ils 16 d'avrel 2017, da Pastgas endamaun, ha el astgau sedurmentar ruasseivlamein.

Norbert Berther